

吳門坊巷待輜吟卷五

太吳 范廣憲 君博



婁門

擷翠無妨緩緩等游閒事業似東流古嚠門闕知何處婁水曾經合喚婁

婁門本曰嚠門秦時有古嚠縣至王莽改為婁縣名也因其所道也

婁江

窺人梅柳意先降買酒尋春泛野艖消息東風傳解凍斷冰無復鎖婁江

婁門外大街

大守鞭牛甚處佳行春猶費踏青鞋莫嫌一出婁門遠此是東郊最大街

九槐村

民風仁厚九槐村老榦槎枒奈不存吳諺依然橋跨井石將軍守寺山門

在婁門塘南唐時物今存二株在老土地堂西昔人諺云出婁門九槐村井挑橋謂永安橋兩塊皆有井橋挑井謂永甯橋底有井石將軍守山門謂接待寺門有古石人獅子石鎮橋心謂官瀆橋有古石獅子俗仁厚皆良民載顧芬記

小橋浜



人家擇處里仁鄉曾記吳船載酒忙  
好倚蓬牕吟健句濛濛煙雨小橋洪

官瀆橋

大麥黃時野雉驕游人閒極遺無聊  
布帆猶恐南風起直泊婁江官瀆橋

跨至和塘元至正二年建

官瀆橋下塘

櫻筍厨開日影長茗樓乍散酒初香  
欲從此處尋官瀆知是橋頭近下塘

林家村

閒游隨處遣生涯吳語猶能挂齒牙  
問俗采風俱不

薄滿村姓氏屬林家

徐河洪

婁郊雨霽日曛曨薺麥清香陣陣風  
記否徐河洪上過尋花問草兩匆匆

官瀆橋上塘

楊花未落棟花開一路春風社鼓催  
官瀆橋頭流水急上塘纔過下塘來

查家街

小市無喧好著書數椽茅屋最清疏  
前身可是先生否仍占查家街裡居

蔣墳頭



人家幾簇市煙稠  
眯眼驚花小夢留  
此日偶過煩問訊  
可曾碑榻蔣墳頭

糖坊灣

稚孫肯伴太翁狂  
光景暄妍愛日長  
肯信含飴成趣事  
一灣猶喜說糖坊

永甯橋下塘

何處逢春不黯然  
風斜雨細奈何天  
永甯橋畔端居慣  
門巷臨流好泊船

南屬二十四都十四圖北屬

馮家村

避秦人說有桃源  
市遠無譁晝掩門  
茅屋參差容小

三

住馮家合族自成村

灰窰場

市隱婁門已半生  
豈忘小劫亦詩情  
灰窰可奈成寥落  
場地猶留舊日名

陳師涇洪

為避塵囂出郭門  
果然非市也非村  
一條澄師涇洪路  
覓醉慙慙日夕昏

一作人四涇洪又作澄泗涇洪

一斗山

勝賞婁郊未擬還  
人間何地有鄉環  
自緣行脚新來倦  
九月纔登一斗山



在澄泗涇內上有小廟廟西一步有古塚壑土得  
古不碣鐫謝文學配沈氏墓七字載吳門表隱  
又

壓酒聲喧市井間暫拋簿領得怡顏良辰佳節休輕  
過雙屐先衝一斗山

駁船浜

賣錫天氣市聲催拂水紅粧賽廟回引得游人多似  
鯽官浜撐出駁船來

關帝廟前

磨刀雨過不飛埃撥動游情蠟屐催為愛婁郊新酒  
熟醉尋關帝廟前來

葉家場

東郊迤邐路修長岸草牆花自在香鄰巷便成驂篠  
地尋芳時到葉家場

蘇巷浜

蘇巷浜前野草花可憐開落別人家哦詩莫起風塵  
歎羨喜生涯有酒賒

沙河浜

春風著意簸吟魂細雨晴時好出門倘識世間盛衰  
理沙河浜看舊年痕

八尺街

婁門城外偶經過抖擻塵囂日未甞小街商量呼八



尺僦居一仞恐無多

戴石屏詩抖擻塵囂上翠微

八尺曰仞

馬衡

遣愁無計漏俱長不待銜杯直欲狂寄住其間如伏  
櫪志懷千里待飛黃



葑門

南郊風物愛清奇  
門對封禺攬可知  
艾土樛生繁種  
植吳聲軟語喚葑宜

仰家莊

葑門城外跡難忘  
髡柳蕭蕭卷夕陽  
身後榮哀誰管  
得舊人指點仰家莊

為明大理丞仰瞻宅故名  
瞻長洲人則吳中之仰  
族歷宋元明而未艾也

又

留去任從歲月淹  
賦歸移疾本無嫌  
舊莊寥落人烟  
散那復朱明話仰瞻

六

仰瞻以忤王振謫戍大同旋移疾歸居此間

安里橋

一橋安里抱城廻  
葑水清流日溯洄  
太息竭來名利  
客幾曾心蹟絕塵埃

在葑門外洪武初里人周元初重建

橫街

中衫脫去著蒲鞋  
逃世常存淡泊懷  
休笑生涯渾漫  
與為貪魚市住橫街

夏家橋

官河彷彿一絃橫  
小市閒坊半築成  
若問夏家今在  
否石橋留得舊題名



夏家橋在夏家橋頭恐即華家橋在蔣家橋東

東街

鱖魚門外景清佳荷蕩芡田是處皆眯眼塵沙心已  
倦為貪鮓菜住東街

西街

不嫌吟帽礙花枝舊夢難忘被酒時此是市街繁華  
地驕驄扶醉玉人兒

又

草色花光雨後晴淨街如繡面西行踟躕小立緣何  
事認得茶坊趨市聲

前草鞋灣

水鴉接翅夕陽殷游覽葑塘不肯還一晌追尋泥飲  
處酒帘斜颭草鞋灣

後草鞋灣

出游但覺意清閒颯颯風吹雨尚慳說與旁人莫煩  
惱踏青又上草鞋灣

北柵頭

拂衣甚處踏春游小艇閒停北柵頭到底及時饒樂  
趣野花開放不知愁

莊心灣

特出葑門訪古宜行囊多采葑菲詩龍升莊已成塵  
蹟獨有斜曛宛舊時



在對門塘疑即龍升莊道院舊址院為至元間鄧道樞建明洪武時里人瞿漢卿重修

石灰窰

對溪衣帶路非遙巷陌幽深遠市囂看到人間清白處留題只有石灰窰

于謙詩石灰詩粉骨碎身全不顧只留清白在人間

蕭堡場

蕭堡場灣綠樹叢歇船人語夕陽中對溪舊事飄零盡墓廢猶餘古道風  
有蕭堡墓今廢洪亦沒

紅板橋下塘

橋名紅板太風流塘水多情引俊游最好携筇斜日裡幾人覓醉酒扶頭

在徐公橋東

裡河橋

新晴村巷午鷄鳴芳草緣堤有意生漫說裡河春漲小近來漸與此橋平

油車場

對門溪水好風光俊侶相招攬勝忙寒食清明都過了油車場外菜花黃  
在裡河橋頭



小覓渡橋

葑水回環倚棹行盤門此去最分明人家漫謔爭妻  
妾覓渡還分大小名

舊名復成橋

馬路橋頭

鱖魚門外足淹徊馬路橋頭曙色開擡舉春風須得  
意桃花叱撥一鞭來

在徐公橋

朝天橋

休沐良辰正及春未妨閒話賦閒人朝天橋下河如  
鏡照見冠巾眼底新

九

俗名外河橋在橫街

葑門塘

風蟬咽露日娉娉塘水粼粼漲綠波一帶農家生計  
足芟田青比稻田多

石炮頭

細靄殘暉去路悠陰陰桑野聽晴鳩老夫脚力頑如  
鐵日日行歌石炮頭

又

大將軍舊號紅衣風日街頭善發機學得破山霹靂  
手花開落地滿天飛

敵樓頭



壘石崢嶸鎮此間居然防守儼城闕樓頭猶峙今無敵與子同仇語似山

蔣家橋

當年里乘幾曾編掌故冥搜詎讓先今日蔣家零落盡樂安世澤託橋傳

在徐公橋東北側

七公堂衙

鱸魚風味愜純鄉更說知機早退藏我羨季鷹真得意年年社賽七公堂

在橫街敵樓西按七公堂俗名張七公廟祀晉曹椽張翰令奉為東吳下鄉土穀神衙以堂名

十

朱家衙

鐵網珊瑚纂古書野航漫錄復何如別來文獻凋殘盡不見長洲處士廬

處士朱存理宅朱凱亦同里按存理字性甫長洲人博學工文纂集鐵網珊瑚野航漫錄吳郡徵獻錄鶴琴隨筆等書

徐公橋

草鞋灣逕足音足猶喜臨流澣石淙追憶橋名論出處采風徐雅繫家邦

在前草鞋灣跨東西河宋慶元四年徐雅重建姚洪衙



路出城南訪葑溪錦囊蠻榼却相携而今薄相姚洪  
術也似飛鴻踏雪泥

鄭家園巷

破瓦頽垣小巷斜幾年前是鄭君家鶯花零落春光  
改無復當初富貴誇

在安里橋北

石衢巷

地僻尋幽興未孤城南消息訪曾無一衣帶水葑溪  
路小市無多冷石衢

青果巷

鱗鱗門外動游塵笠屐斯須總可親冷絕一條青果

上

巷只今名換大河濱

即大河洪在安里橋塊

蕭洪巷

冥搜志乘詎無聊進士題坊歷劫銷縱說清河門第  
在一洪巷陌太蕭條

一作背洪巷昔云張氏故居有進士坊二

施家巷

割股虔誠敢毀膚天倫至性莫嘲愚而今世紀多偷  
薄冷巷猶言孝子朱

今稱朱孝子巷

又



門牆寥落樹棲鴉  
試履衝泥夕照斜  
那識當年朱孝子  
巷名懷舊屬施家

周方巷

周方名巷詎無因  
懷古悠悠一愴神  
儉腹深慚容考獻  
當年到底住何人

在蔣家橋西

吳家巷

鄉題至德澤流長  
石作牌坊螭作牆  
嚮日吳家傳巷陌  
不曾寥落舊書香

陳僉事巷

門巷蕭條跡已賒  
破椽零瓦况欹斜  
謳歌不絕留威

惠使是當年僉事家

為明陳祚僉事宅  
故名按祚字永錫  
吳縣人永樂進士  
累官福建按察使  
僉事有威惠以疾歸卒

漏澤園

一脉黃泉自溯源  
僧門功德弭幽冤  
好風不負西南約  
鼓吹爭開漏澤園

在城西南隅疑令匠門塘橋附近一名黃花涇橋俗訛王瓜橋宋紹熙元年提舉張體仁勅置施邁為記先是崇甯三年指揮置漏澤園取德澤下漏泉之義又紹興十四年十二月奉旨命臨府措置庵屋募僧人主管月給常平錢五貫米一石埋塋



及二百人者申朝廷降給紫衣一道繼准指揮令  
諸路州軍一體措置施行  
隋書煬帝紀云思加泉壤庶弭窮魂之冤澤及枯  
骨用洪仁者之惠

### 佛音巷

去郭天南落照深黃塵眯眼喜清陰詩人不少耽禪  
悅里巷歸來聽佛音

### 邢家巷

懸壺市隱怕徵招心蹟雙清樂亦聊傳語邢量椽屋  
在夕陽巷陌奈蕭條

今名邢家街為明處士邢量宅故名

十三

按量字用理長洲人隱居葑門以醫卜自給性狷  
介與人無將迎足跡不出里門長日或不舉火其  
學無所不通朝士有欲過之者固謝不納

### 斜橋

隕星一霎感難消人破天荒力已超志乘不嫌煩點  
染譚娘韻事紀斜橋

在安里橋旁今圯

斜橋閨秀譚秀姐美而慧康熙丁亥年十七已許  
字待吉矣五月間中庭納涼忽有流星迸光落懷  
驚而就寢明日忽變男體里人異之顧嗣立有詩  
紀異載紅蘭逸乘



徐匠卷

草廬幽靜卜吟鄰  
詎踏看花漠漠塵  
委巷尋來容小住  
不知徐匠果何人



盤門

一枝柳隔一枝栽舊堞猶餘迤邐開盤字題門高百尺勞渠水陸半縈洄

古曰蟠門蓋嘗刻蟠龍之狀以壓越也或云以水陸縈洄屈曲故字為盤也

盤溪

雉堞參差尺五天城南風物最清妍請看衣帶盤溪水日過漕糧幾萬船

如京橋

萬樹垂楊罨綠陰行人斷渡水之潄如京重建稱方便應識當年太守心

即虹橋宋嘉泰四年知府張巖重建至開禧二年知府李大性畢工改今名周虎書三大字刻其下舊名虹橋跨運河上按虹音絳俗書作埵

吳門橋大街

曾說寒閨水泊多詎知熱集市云何吳門橋畔人聲沸知是轆車大道過

即在如京橋東

按王定甫詞云向寒閨晚泊

青洋地

鶴市風光過眼陳櫻花柳絮長溪蘋可憐閒話青楊地冷水盤門不見人



一名青楊地

獨落圩

齒寒爭得未唇亡四埠通商國詎強獨落古圩成讖  
語吳門闢界讓青洋

甘棠橋

綠樹陰陰卷夕陽隔河喚渡笑人忙黃金百笏無虛  
擲獨力成橋嚴裕棠

今更名裕棠橋

又

甘棠橋圯斷河梁重建嚴君字裕棠賴有長虹成普  
渡舊名更換也無妨



胥門  
姑蘇山色變晴昏湛湛胥江水不渾太息蘆中人已  
逝濤聲猶是繞西門

胥江

如鉤殘月挂蓬牕何處潮來夜半降入市釣娘催曉  
發紅螺青蛤滿胥江

萬年橋

謁來船艇密於梭燈火樓臺兩岸多滾滾胥江流不  
盡萬年橋上萬年過

跨胥江上為三吳第一橋歷多覆溺之虞官民惑  
於風水將二百年之久至清乾隆五年知府汪德

馨力闢邪說重建名曰萬年並建吳中第一橋坊  
巡撫徐士林記任其勞者通判王延熙驛丞高世  
傑紳士鄭培基汪會焯張鳳翔李世權載吳門表  
隱按清乾隆辛巳年陳榕門撫軍重修是橋既成  
求令名者使先登焉有星卜者汪萬年盛行于時  
以其名與橋合令其先登眾從之汪大喜率眾過  
焉豈知自此以後無人就而星卜者十月十二日  
天晴風從東北來頗冷修工合龍門償約二千金  
載榕門日記

又

三吳第一萬年橋江水淙潺集市橈紫石無言人有



意嚴嵩佚史話前朝

按胥門向有吊橋紫石甚古明嘉靖時嚴嵩愛而折去今在袁州城外亦名萬年橋董國華記

秦讓橋

秦讓橋前駐繡鞍水仙廟左暫盤桓張嬌李艷憑人取且作圍場射雉看

俗呼洋橋舊都山梁野雉

又

一江煙水抱城遙浮海鷗夷骨久銷餘怒到今猶在越素車白馬恐靈潮

由斯街

十八

由衍斯須莫浪誇青鞋白恰樂無涯名訛牛矢應堪笑歸路由斯見故家

在盛家街南

東坡詩但尋牛矢覓歸路家在牛欄西復西

小日暉橋

市曲彎環路未遙棲鴉流水送輕橈日暉一抹銅鉦響催撤湖邊夏駕橋

舊名夏駕橋跨夏駕湖口因名明成化十年知府邱霽建

大日暉橋

晉騰歲月首重回風物昭蘇四望開記取懷胥橋畔



路慈烏猶帶日暉來

舊名懷胥橋清順治十一年重建

棗市橋

胥門塘上路非遙石跨清流棗市橋似為詩人傳好  
句每因腸斷更魂銷

跨胥門塘



閻門

天開閻闔勢峨峨破楚軍從特地過想見高樓飛閣  
敬舊人曾說跨通波

虹橋

城郭中分一水遙長虹垂釣集吳船元時文貴重修  
建太守更題永濟橋

即釣橋初架木為之元泰定二年郡人鄧文貴捐  
貲易名虹橋明成化十年知府邱霽葺更名永濟

萬人碼頭

一年街市一年新鐵笛吹來破水濱不待葦航頻喚  
渡萬人爭道趁颼輪

南濠街

碧草如茵乍剪齊有紅牆處有驄嘶一條燈彩南濠  
路白裕青鞋盡日迷

甘毳街

街名甘毳雅相宜可奈兒童不識知俚語一時齊附  
和便將乾菜字相欺

一作乾菜街在信心巷西北

上塘街

樊樓飲散酒醺醺歸路道遙帶夕曛一陣市聲喧甚  
處上塘街肆密於雲

鮎魚墩



側帽翩翩乍出游  
尋春似瘧避何由  
鮎魚墩上盤桓  
好覓醉難忘舊酒樓

又

鮎魚墩畔水東流  
催送人歸上小舟  
風大難停鮎魚  
尾最安穩處鮎魚頭

永福橋

新開馬路著鞭先  
歲月匆匆幾變遷  
小住初為祈永  
福人家都半倚橋邊

萬源橋

二月晴光未易描  
香車如水馬蹄驕  
軟紅十丈銷魂  
路艷說金閭阿黛橋

三

今名阿黛橋俗訛鴨蛋橋

丁家巷

賣花天氣困簾櫳  
茉莉香聞趁晚風  
為愛袁郎詩句  
艷丁家巷口月朦朧

又新局街

三五人家好結鄰  
年來溫故悟前因  
不如局街能除  
舊意取湯盤又日新

探橋

探橋跨水護城隈  
潼子門前迤邐開  
自別江南消息  
斷幾時再報捷音來

在北潼子門明洪武間築月城建



四擺渡

獨岸吟中未擬猜霜清曉陌夕樓臺此間或恐銷魂地一葦航之喚渡來

渡僧橋

如雲市集一河橫隔岸人呼艇子輕願折楊枝橋上過街談傳遍渡僧名

跨運河孫吳時民為舟以濟商有僧呼渡舟子弗應僧折楊枝浮水而渡眾驚異羅拜願藉神力成此橋遂募建不日而成以渡僧名載緝柳編

小邾術

瀾翻史乘不須才小術依然問熟開樽捨當年吳表

二十二

隱結基早識季聃來

吳門表隱載周朱季聃奔吳依闔閭結基居此因名

小豬巷

此間端好住屠夫陋巷難將俚俗呼漫笑別來無個事未妨豢養牧豬奴

通貴橋下塘

曲屈春流戀夕陽枝頭鳩婦喚晴光通關橋脚溶溶水過了門前到下塘

丹陽碼頭

電掣年光滿眼愁且拚醉倒試新筍阿蒙不是丹陽



客日日何須到碼頭

小河邊

芟池淺淺茅陂連紫草紅花滿陌所為約釣游尋舊  
侶杖藜扶過小河邊

三板橋頭

閉門覓句嬾看花如此生涯靜待詳三板橋頭追舊  
夢勝停畫舫奏箏琶

馬路

不分西陌與東阡糞土搏沙處處填十丈軟紅開廣  
路輪蹄得意著先鞭  
一名閭胥盤馬路

十房莊

絲絲水柳蘸秋光垣屋參差露矮牆今日拏舟尋舊  
主撐篙直到十房莊

為明尚寶徐履祥宅

聖堂橋東西河沿

聖堂橋畔卜幽栖茆店參差聽午鷄拖屐往尋疑路  
斷試沿河水接東西

寺福橋街

市福街深見賣花聽來軟語盡吳娃俊游兼記銷魂  
事會有春風挂齒牙

一作市福街



猛將街

梅子黃時雨易成沙乾步履喜新晴驅蝗不乞神靈  
護此地空餘猛將名

在聖堂橋街附近

楊安橋

橋跡模糊寺亦荒路東無復見黃牆眼塵心垢都除  
盡我說楊安即道場

在楊安寺東港已填塞

西楊安浜

颯沓吳歌歌正長楊安浜上好風光東浜歌了西浜  
唱更唱采茶兼采桑

三

楊安街

市鬧常憎俗事頻時清乍喜見閒人輕衣穩馬楊安  
街漸近林垵漸少塵

舊有楊安寺元至正年建故名

路頭堂

頻年世變似翻波煩惱人天盡是魔舊日路頭今不  
接堂前香火本無多

郁家浜

焙茶天氣困游人黯黯春愁漠漠塵臨水樓臺應勝  
此問名要記郁家浜

星橋灣



戲辭柴門望酒帘病餘風味更無厭  
星橋灣口明漁火紫蟹霜肥十月火

星橋下塘

草長鶯飛市酒香此間不住任何鄉  
舉家臨水人清絕門外星橋倚下塘

毛家橋街

毛家橋街市聲粗覓醉閒吟道不孤  
但願春風長住此未辭日日得遊娛

寶園街

參差瓦屋近桑麻為避紅塵玩物華  
兀兀出城到何處寶園街晚樹陰斜

時家莊浜

參差市屋夕陽斜一抹晴波景足誇  
過客倘尋浜畔路一莊愁煞是時家

南莊街

手把吟筇自在游清風吹袂覺颼颼  
南莊街畔心常憶美景還須好句收

薛家灣

好出閨門得暫閒擷芳尤愛薛家灣  
好留詩料添吟興帽影鞭絲冒市闌

引鳳園街

補貼光陰且漫論簫聲釵影了無痕  
只愁逸乘搜難



得空愛街名引鳳園

留園

吹花擘柳意何從  
裾屐風流次第逢  
游賞自憐心匪石  
入園先訪瑞雲峰

在下塘花埠街按舊名東園在花埠明太僕徐泰時建清為劉觀察恕寒碧山莊後為盛觀察康所得改名留園今已收歸公有該園石屏高三丈濶二十丈玲瓏峭削周時臣物

按瑞雲紫雲觀音三峯玲瓏高聳宋朱勔所得後歸邵陽董氏移置東園徐氏瑞雲峯乾隆四十四年移之織造府西行宮內紫雲峯久失觀音峯今

屹立半邊街踏坊外載吳門表隱

半邊街

幾間市屋半邊街風物宜人小住住今日遂初真佚老硬思游衍辦吟鞋

旱橋半邊街

此間風景本清佳保甲居然比戶排一桁旱橋流水盡可憐人住半邊街

按街即東園故址

陸家墳

金閭門外水澹澹柿葉微紅映夕曛幾尺殘碑留往跡至今人說陸家墳



恐係明陸完之墓因附近有陸國子巷今稱陸宅

五涇浜

艣枝帆葉任游遨划破玻璃快似刀記得五涇浜畔  
過滿街絃管月輪高

蓮花兜

紅紅白白盡蓮花兜上風清住小家不管鴛鴦驚好  
夢折來並蒂向人誇

沿田街

破閒何處可嬉娛排悶還須待酒沽貪看餘霞添逸  
興沿田街上小踟蹰

福泉巷

春風漠漠吹香塵潑火光陰乍可人且向福泉尋舊  
巷出門扶杖往來頻

西園

欲問西津買小艤雨餘春樹影成雙講經喜赴高僧  
約鷺子飛天護戒幢

在陸宅巷明徐太僕子工部徐溶建崇禎八年捨  
為戒幢律院中有五百羅漢殿佛像迥異放生池  
盡畜巨龜載吳門表隱

桐橋東西圩

東西圩上幾人家門巷清閒少市譁不比桐橋常倚



棹聽風聽水雜箏琶

虎邱路

暮雨瀟瀟一曲愁江南名郡數蘇州香山老去眉山  
繼訪了閭丘更虎丘

東坡嘗謂過姑蘇不游虎邱不謁閭邱為二欠事  
按閭邱為嶺南太守閭邱公顯致仕居吳故也

野猫街

薜荔牆低望裡遙竹籬笆繞小牕寮頽然對客猶多  
事里街未妨稱野猫

糕糰街

舊家小住本清寒畫餅充飢詎可餐詩客年來枵腹

慣解嘲市街喚糕糰

井泉街

趁虛人集半屢氓地僻偏憐過客情生事今來差勝  
昔家居街近井泉清



齊門

嫁吳之子欲歸甯身世堪憐似繫鈴幾度望齊門不  
掩雲愁海思共玲瓏

昔齊景公女嫁吳世子終累登此以望齊也故曰  
望齊門

齊溪

望齊門外即齊溪如帶清流繞市西懷舊詩人行樂  
處夕陽如夢聽鶯啼

大甯橋

飛梁高跨市塵西眯眼紅埃襯馬蹄換劫重修人覺  
便不須波路繞齊溪

元

即吊橋

燕塘滙

真人遺跡日婆婆庵圯碑殘奈若何奚必東西分滙  
上燕塘無恙落帆多

在東西滙之間有宋蓑衣何真人墓

梅村橋

石梁橫亘近平門瀲灩河道驛站喧別有貝家懷孝  
思題詩休更誤梅村

在平門外

錢萬里橋

策驢城外路猶賒况復遲留喜莫涯萬二竟訛成萬



里更何賣女說錢家

一名錢萬二橋又名錢賣女橋宋末時建明正統間  
況鍾再建

板刷巷

伊誰辛苦趁清晨聚族而居不擇鄰板刷巷前春許  
買不愁衣袂著纖塵

東滙巷

東滙清波看浴鳧參差市屋畫成區燕塘風景吾能  
說一幅蒲帆落照圖

又

參差屋似魚鱗次斜曲街如尺木通遙認星星燈火

出一條塘水滙之東

鮑家巷

小蹇閒游類轉蓬無風無雨莫匆匆吾今詩美鮑家  
巷不在齊溪小志中

在十六都二圖

悟真巷

滿目滄桑蹟已陳菘年有幸署遺民題詩此巷宜先  
及賴有禪庵記悟真

一作悟真庵巷在十六都二圖

陸游詩還朝此段宜先及豈獨遺經賴發揮

張家巷



巷陌依然景物非  
游車冷落夢痕稀  
清河張姓嬋媽  
盛後裔於今漸式微

朝天橋

草色花光景物饒  
朝天湖口可停橈  
記取記取伊家  
住門對紅欄齊福橋

在朝天湖口故名亦名齊福橋俗名南馬路橋  
明況鍾始以石為之

義成橋

游春俠少競聯鑣  
小飲銜杯逸興饒  
指點齊溪好風景  
出城先過義成橋

對馬路口俗名此馬路橋  
清康熙間督糧道劉鼎

重建

西滙巷

可憐天氣日悠悠  
不待春殘始擬游  
認得踏青先到處  
望齊門外滙西頭

財神堂

每逢朔望進香辰  
五顯曾傳姓願人  
趣語忽聞商賈道  
吾曹只合供財神

在姚家街底

宴春橋

題名剪燭記良宵  
笛語簫聲韻最嬌  
遮莫釣游情未厭  
尋詩多上宴春橋



在城門口跨西滙民國十三年甲子顏心介春宴  
陸仲英楊則庭首捐助成

橫街

一生放誕署名銜說古談今興不凡踏入橫街誰識  
我芒鞋紗帽白涼衫

油車橋

尋芳火伴戲乘肩笑說良辰景物妍菜子榨來真有  
味油車聲出此橋邊

普利橋

甚處隨風送客艤溪流洄洄詎曾停市人普遍求漁  
利我獨橋頭話井亭

三三

俗稱井亭橋

楊涇橋

銷夏聲傳軟語中采蓮人妬藕花紅楊涇橋口乘涼  
好小艇瓜皮倚晚風

臭馬路

馬路蕭蕭冷似煙輪蹄無復軟塵憐揚名縱說流芳  
好遺臭何嘗不可傳

現改清潔路

壩基橋

行行北郭折虹腰聽賣錫聲滿市察莫笑相如工作  
賦偶題稱意壩基橋



橋東睦字圩有明可竹先生蔣果墓正德十六年  
葬子京義士修孫一中二南四維祔子孫衍盛演  
劇祭掃又橋內有昌平巡撫何謙墓子諸生事祔  
因無後妻關顧氏供稅祭

宋涇橋

朱涇橋過宋涇橋上塚船多逐隊搖行到柳嬌花媚  
處借人杯酒我先澆

日暉橋

卜築年年願總違板輿無計迎親歸一橋跨水通來  
往記得人前喚日暉

石獅涇橋

携朋載酒出郊坰時節分明趁踏青借問飛橋名不  
識行人指說石獅涇

有供饌義學道光九年浙紳楊于高周士連倡建  
嵇文煒楊昕等助之募資延師教育貧家子弟總  
督陶澍給匾曰韻輔菁莪巡撫林則徐給聯曰越  
角吳根到處孤寒思廣廈虞庠夏校從來陶淑在  
初基學政朱方憎聯曰不為名不為利且菩提濟  
世之心克綏寒畯在說癡任說歎堅愚叟移山之  
志用肇丕基布政使梁章鉅聯曰說塾定良規廣  
廈大裘立遠事功隨地見勤修懷往哲斷齋當粥  
孤寒子弟讀書多



陶家卷

仙人一去不須歸  
今昨何煩問是非  
卷與淵明同隱  
逸姓同弘景有光輝



吳門坊巷待輜吟補遺

太吳 范廣憲 君博

北濠街

踏歌兒女樂相仍情味難時記未曾點綴承平新氣  
象出城先剪北濠燈

一稱北濠街在閭門外

八字橋

年年看月影當頭八字橋邊水自流知有船娘猶待  
字浮家身世始言愁

又

燭影搖紅映碧紗倚樓人面似桃花語郎記取門前

路八字橋邊第一家

高田上

幾度閒游尺五天春來怕見草如煙憐他幾畝高田  
上但欲栽桑又變遷

官街

酒市聲喧醉客多門前官街後官河吳船小妓楊花  
曲抱得箏琶掠影過

糊獠洪

申王玩世語嘲諷正好黃昏散塾回洪喚糊獠成一  
笑衣冠原自沐猴來

天竺庵前



世劫如棋滿布枰看來黑白太分明勸移天竺庵前  
住好聽禪齋梵唄聲

裡小橋

裡小橋頭畫鼓過橋烏橋燕受風斜岸邊處處鋤甜  
菜市上家家淪苦茶

大小魚池

嫩靄輕陰二月時吟鞋辦好踏青宜魚池却有濠梁  
趣此樂倘佯我獨知

木耳場

散地脩然曳杖行脫巾漉酒未忘情村翁舊話真堪  
笑場上何曾木耳生

潭子里

隔牆呖軋響縑車小繭抽絲到日斜潭子里邊最清  
絕市塵不染採桑家

朱家棧

閒把筇枝信步行朱家棧上愜幽情造成世劫鶯花  
笑多少英雄未退耕

莊家園

雙鬢蕭疎又見春歸今乞得苦吟身莊家園裡花如  
繡不見當時舊主人

凌家棧

到處人生若夢迷及時行樂好留題蹇驢晚過凌家



棧一路楊花半踏泥

狗廁街

捨舟登岸手杖藜信步閒游路欲迷試問街名問口  
笑如何狗廁入詩題

王師浜

一雙蠟屐伴筇枝未擬人扶緩步宜為愛蛤蜊初上  
市王師浜角獨題詩

三間頭

讎書原破日清閑游記頻書興自刪架竹苦茅能遂  
願頗聞有地恰三間

朱家浜

市塵擾擾日駸駸何處清游可散襟最憶朱家浜畔  
路亂飄楓葉費沉吟

越城後街

積毀雖銷敢乞骸醇醪有味便開懷越城南北俱臨  
市揀得幽居最後街

馬庵街

世網塵纓不繫心此心唯有老禪林馬庵他日從吾  
好會約吟朋共合簪

新街

榭葉初黃柿葉稀數家瓦屋帶霜微年來世路都諳  
盡一宿新街念念非



水溝街

淡日輕雲一快游，偷然散地自風流。  
定居僻街君須記，靜聽娟娟水出溝。

劉家棧

身是前朝一秃翁，可令虛死古吳中。  
布鞋重踏劉家棧，水柳棲鴉落照紅。

茅山堂前

燒香結隊女巫班，符籙堂前列炬環。  
聽得鼓鏡聲不斷，道人爭說禮茅山。

范家橋頭

舊住吳閭一闕塵，敢將世闕傲朝紳。  
橋頭典故閒徵

遍，齏粥家風得幾人。

八房河

瀟瀟暮雨唱吳歌，巷陌平康雜綺羅。  
月上樓臺花映舫，銷魂猶說八房河。

西街

游娛何處愜吟懷，沉醉風光眼重揩。  
自入山塘風景好，就中惆悵是西街。

六房莊

誰家巨富甲吳閭，勝國猶傳徐履祥。  
知是渠渠開廣廈，尚書曾隱六房莊。

又



田連阡陌市連房城北多財壓四方聞得口碑傳道  
路大徐忠厚小徐狂

十房莊

渠渠華廈已難詳收帳船來泊近滇省識富財甲吳  
下地名留得十房莊

在閭門下塘

五福路

車塵馬路市聲喧寒碧山莊留古園花步墜開迎五  
福敢將佳讖日臨門

俗稱留園馬路

湖田上

強半流光醉後來野花齊放鞭然哈春風吹遍湖田  
上妬煞青裙幅幅開

新民橋

西南風好記前回一笑欣然倦眼開油碧不知過幾  
許新民橋上碾輕雷

陸國子巷

舊時花草滿庭除惆悵科名近不如何處清華風景  
好全卿曾此閉門居

明尚書陸完所居因名

木場頭

紅桑小劫始言愁風月多情繫夢游可是盛衰干地



運繁榮不到木場頭

打索場

柳色青青月色黃  
溫柔原不負年光  
一從曠劫湖山後  
著句難題打索場

官衙堂

劫後鶯花慘不紅  
戰塵依舊隔春風  
經行官衙堂邊路  
十室無如八九空

貴門街

風光本地散吟懷  
酒幔茶樓近市佳  
漫笑鯁生詩吻薄  
但言常踏貴門街

洪底頭

晤語無人豈小留  
出門聊復遺閒愁  
春風擡舉書香戶  
鎮日沉吟洪底頭

大覺庵衙

拄杖人尋大覺庵  
放懷詩酒樂耽耽  
而今里衙蕭條甚  
游客稀如優鉢曇

北園場

頽然爛醉倚繩床  
蝶夢初回喜欲狂  
好聽比鄰諸野叟  
負喧閒話北園場

太平坊

人心厭亂乞諸天  
一笑神仙更可憐  
至竟戰雲來日亟  
太平曾得幾多年



求籤衙

小衙閒游不戒嚴擇居仁美喜風恬鳳皇早有棲梧  
志求得神靈第一籤

在楊安浜

石牛頭

人間隨處得句留可奈年光逐水流小技黔驢緣路  
熟揚鞭叱到石牛頭

舊有即山庵因庵前有石牛相傳唐時物更名石  
牛庵宋咸淳六年僧志行建明萬歷二年僧惟靜  
重建地以庵名在閭門外下塘

洞涇

連日城中醉復醒平生幾屐出郊坰疏狂合是騷人  
未又說扶頭入洞涇

白蓮橋

此身有計遺無慘偷得清閑半日消細擘吟牋携酒  
梳白蓮涇上醉題橋

跨白蓮涇

十房莊橋

柔曲橋欄映水紅微波通處儼垂虹十房莊喚名猶  
在寂寞徐溶宅已空

在十房莊西屬虎邱

六房莊



高車駟馬駐門牆自擁琴書興未央  
留得履祥遺宅在風流占斷六戶莊

在下塘花埠街

芙蓉橋

冷落橋頭幾苑枯幾時廢後更模糊  
只今開落秋江畔猶記前人秀句無

在閭門外元沿縣治

洞涇

歲月侵尋醉復醒茅茨自葺小於舲  
而今槌鼓應惆悵髡柳枯荷滿洞涇

翁園

芟草通池署翁園種梅地僻絕囂煩  
春寒未勒開香雪那禁賓車駐短垣

俗名張家花園在永福橋

張孝子墓

回祿焚如慘迫亡何來拯母事堪傷  
請看煨燼猶相抱杯土宜旌孝子張

青山橋

水暖蘋香物候妍花朝花市得嬌憐  
青山一桁橋深鎖人語吳船月上弦

在山塘

毛家街



衡關毛家路一條近郊都願住閒寮游紅艇子春三月撐過山塘第幾橋

在秦定橋西

白公隄

山塘盡處白公隄一樹垂楊一剪齊劫後風光看不得浮沉但見聚鳧鷖

青山橋洪

僧扉雖設不曾闢詎怕鞋痕損鮮斑筆硯先安當著句一浜橋影擁青山

半塘橋

一篙綠水泛輕鳧買醉橋頭繫纜初七里塘行三里

半不妨暫憇卜幽居

西山廟西街

飲人扶醉酒如淮攘攘熙熙好騁懷安得春期爭賽廟吹鐃擊鼓過西街

雲巖寺

能藏山色寺為誰名著雲巖地未移自有詩僧工點染手持白紙乞新題

躲賽橋

硯田荒廢不生財笑我難為阿堵才等是催租同掃興解嘲躲債過橋來

俗名躲債橋跨魯班塘在萬點橋西



留園

寒碧雙池草似茵冠雲峰下且逡巡坐花醉月非吾  
好愛看屏張孔雀馴

為明徐同卿泰時東園故址

四圖觀

笠屐安排偶一過傳疑辨異費猜摩四圖觀地如甌  
脫其奈華離錯雜何

疑作司徒觀係四圖所管華離之地而錯雜于他  
圖之間者

碧潭卷

一潭清水碧盈盈此地風光別有情不愛燈花愛燈

十

草路人心事欠分明

俗名陳燈草巷

石灰街

一條冷巷故幽嫻此地端宜禮數刪猛憶于謙詩句  
好只留清白在人間

在石家街繡花街間

瑞光塔

巍巍七級塔猶存瑞氣文光聚筆痕却笑燃燈開放  
日漁人辜負善人恩

北寺塔

金氏由來苦行僧募緣復塔世咸稱宰波九級間登



覽按步雲梯到上層

舊建十一級有行者金大圓募衆復建僅九級

文山寺

正氣常存確不移相公勲業彪當時漢人豈作降臣  
子半壁河山一臂支

在禾家街

白蓮教寺

教寺逶迤號白蓮捫碑始識赤烏年滄桑換劫增華  
構檀越金多不吝錢

在陸墓

淮張義阡

棠梨花落草芊眠賸有淮張舊義阡王廢基前成一  
歎不知名氏但知年

在王廢基

漏澤園

一脈黃泉好溯源春風口角言猶存溯洄舊宋張提  
舉潛德幽光漏澤園

在匠門塘橋附近即王瓜橋葑婁之間均有  
取德澤下漏泉之義

棋杆里

祖孫殿撰掇巍科甲第蟬聯更足多零落書香成一  
歎棋杆里下怕重過



在十全街彭氏為吳中大族

西館橋

卜築幽居折桂花清閒尤愛竹欹斜門前記取題筠  
谷西館橋邊第幾家

榮巖待制居

北郭

風日清佳未擬猜望齊門外好徘徊踏青草軟吟鞋  
穩賺得詩人北郭來

徐幼文貢布政宅在齊門外幼文號北郭生

秀野園

雅負風流天下尊聯翩裙屐正開樽閭邱巷陌猶斜

日水木清華秀野園

顧嗣立庶常秀野園在閭邱坊巷依園

張吳王廟

江淮廟貌太淒涼社祭年深緬故王吳地輝光秋破  
晦家家心熱久思香

又

公道人心迄未忘火龍蜿蜒佈街坊吳儂白髮談遺  
事追悼猶燒九四香

瞭高台

西郊山色上青袍排闥山光入夢勞每向瞭高台上  
望陽山不及穹窿高



陽山高又高不及穹窿半節腰吳諺也

御道

勝國承平溯勝游六龍一去幾經秋只今落葉蕭蕭  
畔輦道斜陽跡尚留

五福橋

橋名五福跨飛虹雲白山青入望中恰喜臨門塘水  
活朝朝來往看開蓬

在橫塘普福橋西其南境有范墓

唐寅墳

夢墨亭荒夕照紅行吟有客訪村中殘碑出土桃花  
落忍聽牛羊笛裡風

十三

在橫塘王家村

治平寺

茱萸留住好秋光無雨無風折屐忙盍向治平寺中  
去牽羊賭彩賞重陽

在石湖邊

彩雲橋

一橋通處兩溪流分道江河不可留三百人家齊隔  
岸水烟淡宥市煙稠

在橫塘

永壽橋

跨塘東去水迢迢載酒船停永壽橋聽罷吳歌人不



見欄干紅處累魂銷

俗名東跨塘橋在五塢山前明傅潮建

龍山塘橋

一筇徙倚步遲遲燈市茶亭繫我思  
好趁龍山斜日候跨塘西畔認橋歌

俗名西跨塘橋在橫山北麓

三官街

欲避紅塵事不難須知風水總相干  
何當移住三官街茹素心閒托庇安

在戴家街街在石獅子口北

詩卷

十四

蕙草幽馨小卷斜夕陽斜照是詩家  
不教載並吳娘去聽雨簾櫳一抹遮

玉帶橋

垂柳如絲縮畫橈暫時游行景難描  
袁郎詩句多清麗虹彩橫飛玉帶橋

俗名水門橋在新學東

和合街

歡天喜地笑聲多樂事常容曳履過  
小街流傳和合好可相稱喚萬回哥

在城東丁香巷中

換馬橋



伯樂如今不再生  
驪黃牝牡少真評  
還珠買櫝猶難  
遇何況橋頭換馬情

大慈坊

我我禪院似孤村  
斷鼓零鐘落日昏  
詞客重來尋勝  
跡書坊人是趙王孫

以寺為名即山禪寺  
祥符初賜名大慈燬于兵宋  
知府趙與篋書

鄒家巷

蟲沙劫盡路先迷  
近市人家列未齊  
我欲安貧求樂  
道心香一瓣熟鄒輓

宋鄒輓字行之平江人列艾家巷后開家巷前

六通巷

市肆橫斜綠樹中  
酒帘飄颺棟花風  
祇今歷劫輿圖  
改舊巷無人喚六通

列船場巷支家巷之間

醋庫巷

斜日歸來興不孤  
行吟緩緩一筇扶  
當時醋庫雖停  
廢冷巷名仍舊貫喚

跨塘橋

垂柳如絲綠未長  
吳船待渡趁斜陽  
春來幾度橋邊  
醉猶約騎驢過跨塘

在盤門西五里題曰橫塘古渡



黃天蕩

湖光晴碧映滌洄一棹夷猶甚處來風物堪憐總依  
舊綠荷紅芰半曾開

一名荷花蕩在葑門外二里許

澹臺湖

訪古情恨歲月深赤門而外慣行吟滅明遺宅成湖  
後未必神州隨陸沉

在赤門外為澹臺滅明宅後陷為湖載吳地記

德馨里

斟令酌古日蹉跎偶爾尋芳得小哦入市德馨誰擁  
鼻笑嫌銅臭此間多

十六

山茶樹頭

粉牆一帶接尼家小課青燈巷陌斜料是聽風聽雨  
後吹紅霽色上山茶

在東花橋巷東樹為元人所植今在尼庵中

楊王廟巷

暖日如薰柳染烟興來衝屐更晴妍楊王廟古兼呼  
巷快約鄰翁掠社錢

疑即羊王廟街

葑門塘

透水秧針一碧齊桔槔聲裡灌方畦今年是處農桑  
早未擬催耕布穀啼



橫巷

地偏幽僻巷仍橫最近東隅水更清能到其間容小  
住一時茗椀雜詩聲

在中張家巷北

胭脂河頭

山塘上下起吳歌夾岸花光闌綺羅一舸闌紅停水  
閣胭脂河畔艷陽多

白龍廟

白龍廟古在山隅吳下人推第一流懷舊希文添韻  
事親祈靈雨到姑胥  
相傳有女感氣而生龍故鄉人歲有龍歸祀母之

說

